

Rey di Dande a ricibi Corona 5.30 or mainta



Rey di dande 2008 **Jeffrey Kelly** a ricibi su corona 5.30 or mainta, no pasobra e concurso a termina e ora ey pero pa motibo cu e no tabata sa mes cu el a gana. E rey sin corona tabata drumi tranquil den auto na momento cu resultado a ser anuncia. E concurso a termina mas o menos 5 or, pero e ora laat aki tabata tin su motibonan cu tabata otro di e festivalnan anterior. A cambia di **Caiquetio pa Sport Boys na Angochi**. E publico a haya su mes den un patio aire liber cu despues di 12 or anochi a hinca tur hende den ambiente di winter.

DUSHI LUGAR

E anochi tabata fresco y agradable pero despues e friu ay aden. Por a sinta admira e escenario estilo cas antiguo arubiano y e ambiente den e patio aki, sinta dilanti e escenario nobo ta ponebo sinti bo mes na cas mes ora. Hopi hende a comenta esaki masha positivo. E festival a cuminsa laat. Pakico? Pasobra un bon awacero a cay poco prome cu 7 or y pa ora cu a stop di yobe tabata tin dolor di haci tur stoel y mesa limpi, esta seca nan y prepara di nobo. Pa ora cu tabata cla pa maestro di ceremonia cuminsa papia, ata coriente a bay parcialmente den Sport Boys. Atrobe a dura bastante pa a elimina e

problema tecnico. A resulta cu e equiponan di sonido etc cu tabata tin

conecta na e sistema di **Sport Boys** tabata di mas pa e sistema.

Tabata bon tambe, pasobra ta e ora ey e publico a cuminsa yena e lugar y ademas directiva di **Sport Boys** a pasa den su prome prueba grandi pa un festival of actividad di e tamaño aki.

E mes anochi a wordo papia di e cambio cu lo bay haci riba e sistema electrico di e lugar.

SOBRINITOS

E Festival a cuminsa bunita mas menos 9.15 or anochi cu himno, y discursonan, sigui pa e grupo **Tipico Sobrinitos**. **Sobrinitos** tabata cla pa cuminsa for di 7.15 or y e dos ora di espera a wordo corona tog cu **Jasmira Tromp** terminando na di 7 lugar di propio composicion cu su tumba traha den pura: "**Tumba den Pura**".

A sigui e grupo di **Randall Croes, "God's Soldiers"** y **Randall Croes** cu e grupo aki a termina na di 8 lugar den cancion tipico cu su potpourri.

Mes ora despues **Tony Werleman** cu su grupo **Alegre Noord** y e tipico di familia aki, a deleita e publico cu e fox "**Un propio Arubiano**" di Tony y varios cantante di Dande, pero ningun a logra clasifica den e lista di diez.

Mi tin cu menciona aki cu

mester tene cuenta cu **Francella Jacobs y Angeline Henriquez**. E dos damitanan aki ta na caminda pa duna competencia fuerte den futuro cu bunita voz y bon interpretacion di dande. Tipico Ban Uni cu a sigui no a logra cay den premiacion a pesar cu nan

cancion tipico "Chincha come mop" a cay na agrado di hopi.

Grupo di Betico despues a subi escenario y aki a haya e otro problema di coriente.

Na momento cu **Tommy Croes** tabata interpreta su danza "**Nos kier ta mey mey**", ata tur cos a bira scur.

Luznan a paga parcialmente atrobe y escenario a keda den scuridat y **Grupo di Betico** a sigui toca bay y publico cantando cu nan. Despues di a remedia e problema di coriente, e Festival a sigui bon den un tira te final, sin problema mas.

Tommy a conquista prome lugar den tipico cu su danza "**Nos kier ta mey mey**", pero **Grupo di Betico** a logra tambe prome lugar cu Propio Composicion canta tambe pa Tommy.

Den competencia di dande, tabata **Jeffrey Kelly** cu e grupo aki cu a wordo corona como **Rey di Dande 2008**. Di e mes

grupo **Eric Ras** a termina na di 3 lugar y **Rupi Rupie Croes** na di 5 lugar di Dande.

Tipico Macuarima a subi escenario mes ora despues pa duna competencia, y di e tipico aki **Fernando Dirksen** a cay den premio como nr. 8 di dande y nan a acompaña e cantante **Jessica Ras** cu a termina na di 3 lugar den dande, categoria damas.

Pa loke ta cancion tipico, **Tipico Macuarima** cu e cancion **Milos** a termina na di 3 lugar.

E grupo **IPA-TUR** a sorprende cu nan actuacion despues y den tipico nan **Maria Elena** a termina na di 5 lugar.

Maria Elena (Croes) na kende e cancion a wordo dedica 18 aña pasa cu su nacimiento, tabata riba escenario den e grupo. Su ruman **Maya** a trata fuerte den dande pro no a clasifica.

Tipico Arubano manera ta custumber, ta un di e mihor tipiconan di nos isla

y nan a briya atrobe e aña aki, principalmente cu e "**wals Anette**" terminando na di 6 lugar cu e cancion aki den tipico.

Den dande nan a acompaña **Hellen Flanegin Arends** cu un biha as a wordo corona como **Reina di Dande**.

Los Hermanos tambe a haci un bon papel e aña aki y den tipico a termina cu trofeo di e di 9 lugar cu "**Abo so' di Padu**".

Randall Trimon a termina na di 5 lugar cu propio composicion "**Esaki ta un amor**" y **Eusebio Tromp** a termina na di dos lugar den dande.

Mester tene cuenta cu e hoben aki ya cu e ta na caminda pa e corona den futuro.

Un excepcion a ser haci den e programacion pa Paranda ta Nos toca mas adelante ya cu nan tabata program pa den final. Tabata tin bon motibo pa haci e cambio di emergencia aki y **Jair**

Sigui lesa Pg. 33

Continuacion pagina 32



Boekhoudt a termina na di diez lugar tambe den Dande cu **Paranda ta Nos**.

Jair tambe ta un cantante cu mester tene cuenta cune pa futuro. E corona casi ta pas riba su cabez.

Marlon Maduro a presenta cu su Tipico **MADU** y el a bay cas tambe cu trofeo di 8 lugar

di propio composicion "**Mi pagara di fin di aña**" cu a explota bon e anochi aki. Jossy y su grupo no a cay den premiacion pero no por keda sin menciona con el a hinca tur veterano den publico den trance di 50 aña pasa mas o menos cu su "**31 di December**" cu tabata exito di **Edwin Thomasa** y areglo di **Edgar Supriano**.

E grupo cu a sorprende pa nan progreso musical tabata **La Bomba** dirigi pa **Casey Dozier**.

Despues di 10 aña luchando cu muchanan riba tereno tipico y dande, **Casey** a presenta cu su grupo cu nivel halto e aña aki y a duna **Tommy Croes** competencia masha pisa.

Pa un fraccion den puntuacion **Tommy** a gana premio tipico, riba "**Encantadora**" di **La Bomba**, toca mahistralmente riba violon pa **Omar Kock**.

La Bomba a sorprende cu un debutante den dande,

Susy Kock, cu for di su salida por a spera caba cu e lo ta un di e ganadornan. **Susy** a debuta den e grandinan terminando na di dos lugar den categoria damas cu **La Bomba**.

Den propio composicion **Casey Dozier** no a keda atras tampoco, ya cu el a termina na di dos lugar cu "**Keto bai**".

No por keda sin menciona e cantante femenino di dande, **Catherine de Cuba** cu a canta cu **La Bomba**.

E tambe a pas e corona prome cu su actuacion y ta indica cu den un futuro cercano e corona di **Reina di Dande** lo por ta riba su cabez.

Tene cuenta cune.

Tipico perla tabata den ambiente di show familiar y aki ta tata **Frank Kock** y yiu **Ronwayne** tabata e showperson nan riba escenario.

Frank a demostra **Ronwayne** cu e tin cu warda poco mas pa corona di dande. **Frank** a termina na di 9 lugar.

Pero den propio composicion **Ronwayne** cu su tumba "**nos cultura, ban apoye**" a sigui consehonan di su tata y termina tambe na di 4 lugar.

Tico y su Estreynan a subi escenario pa no bay cas man bashi.

Den cancion tipico "**Bè'** di **Bernadina Grovel** toca



instrumentalmente a termina na di diez lugar. Den Propio composicion **Tico** a clasifica **Arienne Vrolijk** na di 6 lugar cu e wals "**Nos Folklore**". Ki voz dushi e mucha muher aki tin, y cu bon guia lo por yega leu den canto. Su presentacion y canto for di comienzo a duna indicacion caba cu e lo no por keda man bashi. Esey no tabata tur tampoco pa **Tico y su Estreynan** pasobra den propio composicion **Anthony Peña** a logra di 9 lugar cu su wals "**Sea orguyoso di bo pais**."


Cu **Tico y su Estreynan Henry Kock** a logra di 10 lugar den propio composicion cu su tumba "**Aña nobo bon bini**".

Henry ultimo 40 aña ta conoci como un di nos top tumberonan.

E nunca a gana premionan grandi, pero den mundo musical di nos isla, e admiracion ta grandi pa e compositor, y cantante aki cu nunca a laga su tumba cay y tin su nomber graba

den mundo di tumba di nos isla.

Otro cantante veterano di tumba cu a logra premio den dande cu **Tico y su Estreynan ta Chinto Croes** cu a termina na di 7 lugar.



Alma Folklorico di Robert Maduro tambe a cay den premiacionnan cu **Roderick Franken** logrando di 4 lugar den dande y den tipico **Robert Maduro** a logra di 4 lugar cu nan "**Salada di Wals**" instrumental.

Yegando final di e anochi y madrugada largo, **Frank Croes y su Tipico Pegasaya** a subi escenario y a pega varios trofeo.

Danilo Vrolijk a bay cas cu dos trofeo cu ta di 6 lugar den Dande y di 3 lugar den Propio composicion cu "**Kico a pasa**" (durante 2008).

Un cancion cu ta satira sucedidonan durante aña. Cu cancion tipico **Frank**

Croes a logra di 7 lugar cu e instrumental toca cu su harmonica (sinfonia/sonfonia di boca) "**Baranca di yerba**".

Por a ripara sinembargo cu e publico a crece e aña aki pa e festival y si no tabata pa e problemnan menciona e lo a termina por lo menos 3 ora mas tempran, mientras cu e esfuerzonan ta ser haci pa e termina mas tempran ainda. Fundacion di **Festival Tipico**, propio composicion y Dande a haci un bon escogencia cu **Sport Boys** y pa otro aña lo por spera mas publico y ambiente festivo un biaha mas.

Juby Naar